



Germanica	Gallica	Italia	100	200	300	400	500	600	700	800	900	1000
35	30	75	100	125	150	175	200	225	250	275	300	325
52	100	150	200	250	300	350	400	450	500	550	600	650

EVROPE.

C'Est la partie du Monde, que nous appellons pour le present, La Chrestienté: combien qu'en aucuns endroits d'icelle, la foy Chrestienne, (helas, par la tyrannie du Turcq) a esté abolie. C'est bien la plus petite, quant à son estendue, entre les autres parties du monde, combien qu'elle a tousiours esté reputée pour la meilleure. En ceste partie, y a encores pour le iourd'huy plus de vingt & huit Royaumes Chrestiens, sans l'Empire Romain, lequel passé encores tous autres Empires en dignité & reuerence, & iadis en puissance & renommée. Les principales Prouinces de ceste Europe, sont celles cy (commençant à l'Occident par le Midy vers Orient, iusques en Septentrion,) Espagne, France, Allemaigne, Italie, Slauonie, Grece, Hongarie, Pole avec Littau, Moscouie, ou Ruffie, & la partie Septentrionale iadis appelée Scandia, où il y a Norduege, Suede, & vne partie de Denemarque. Les Isles appartenantes sous icelle, sont: l'Isle iadis appelée Albion, maintenant Angleterre, & Escosse; Yrlande; Frislande; Yslande; & Groenlande, toutes enuironnées de la Mer Septentrionale. Les Isles situées dans la Mer Mediterranee, sont; Sicile, Candie, Corse, Sardaigne, Maiorque, & Minorque, Negroponte, Malta, Corfu, Stalimene, Metelin, Sio, & plusieurs autres petites Isles situées en Archipelago, & és autres Riuieres.

Par tout ce Pays cy, l'air y est bien temperé, & parce bien fertile, semblablement mieux habité, que les autres parties du monde, avec force belles & magnifiques Villes. Entre lesquelles est encores pour le present (comme de tout temps a esté) la Ville de Rome, la principale, qui tousiours a esté par tout fort bien cogneüe.

Les habitans de ceste partie ont tousiours passé les autres Nations en subtilité d'entendement, & dextérité corporelle; par lequelz moyens ilz ont iadis subiugué quasi tout le monde, au moins les parties dont ilz ont eu cognoissance. Comme lon a bien veu, en premier lieu, au Royaume de Macedoine par Alexandre le grand, mais principalement depuis ce temps là par l'Empire Romain; & presentement, par le Roy Catholique des Espagnes nostre Souuerain Sire, & le Roy de Portugal, qui entre eux deux dominant aux quatre parties du monde. De sorte qu'il semble, que les habitans en ceste partie susdicte soyent de leur naturel idoines & aptes, pour gouverner les autres parties du monde.